



75427/7922

11

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

OCT 20 1960





眉公先生晚香堂小品卷之十八

雲間陳繼儒著

傳

貞懿吳母傳

哈佛大學漢和
圖書館珍藏印

吳伯霖治經。稱社祭酒。別十年餘。而余與之遇。索笑
軒。班坐堤上。日暮風起。白楊蕭蕭。伯霖不語。而意自
慷慨。余心知其非經生也。今年乙未。余經所見。爲壽
吳母詩。若歌者衆。問之。皆曰。伯霖有母。母之六十也。
子女洗酌甚懽。而母忽嗚嗚咽者三。亟命懸中州公

像具觴豆。先薦而後嘗之。賓客聞且見者。以爲知禮。獨伯霖心動。不敢言。未幾。慶者舍而唁者途矣。孺人孫氏。錢塘江滸古塘公之長女。中州吳公之配也。孺人幼工書筭。喜讀史。間出臆語。課成敗。多中。治家恭儉明慧。上下以諧。六年。遘內外之喪。產漸訕。遂與中州公如華亭。消息數年。飽其橐而歸。歸有中州公之寡嫂。公故母視者也。迎養之。其三歲孤。故子視者也。擇同生姊之子妻之。至是。夫婦始相顧。退息爲菟裘計。老矣。而中州公視前。亦日閒以止。客以壽公。公笑曰。余之病而從方外游也。孺人爲治山中裝。歷三載。始克復有生。生而間關拮据。又歷十五載。轉徙吳越之間。始克復有家。若是者。正惟吾婦之賢。孺人聞而委蛇謝曰。嘻。婦職耳。此何足以侈君。君不見堦前十乎。能讀史記漢書左氏傳矣。丈人行過而禮之。且有問吳氏子。引爲小友者矣。伯霖既有聞于當世。車騎填戶。孺人輒從屏幃間密矚之。客滾滾覺豪雋言可聽者。未嘗不剪燈市酒。盡其議論而去。伯霖數上公車報罷。還伏牀下。謝無所逃責。孺人第緩拂纓。

上塵慰勞數四。色加怡。伯霖出多長者游。入則反面以盡釋其峭岸不平之氣。則孺人以也。孺人事繼母如父。中州公嘗三拾遺金。三返亡者。孺人往往輔以贊嘆。喜動眉睫。是皆人情所難。沒之日。其子之友及門人賢而思之。謚曰貞懿。嗚呼。婦人不稱謚。謚孺人者。以其能爲人母也。雖然。伯霖非經生也。子伯霖足母矣。奚其謚。

陳子曰。吾聞諸人。驅車至越。而不識伯霖。不名游也。游伯霖而不拜其母。不名伯霖客也。余交伯霖十五年矣。母六十不果觴。今及葬。而始以伯霖之請。許之傳。夫傳弗可已也。則謚弗可已也。于是合而傳之曰。貞懿吳母云。

李母楊節婦傳

節婦楊氏。青浦縣學生員李光初之配也。其父爲中丞朋石公。祖細林公。稱名族。少嫻于女憲。甚有德音。十八歸李君。性剛介。言笑不苟。妯娌莊憚之。啁李君曰。新婦不曉事。盍置副。李君不爲動。讀書山寺中。風雨。蓋鹽。晏如也。戊戌。應督學使試。感寒歸。楊氏初舉兒。投兒李君懷。而身則力疾藥裏間。搯色聽聲。露禱請代。李君竟不起。楊氏號踊治喪。陰挾利刃欲自殺。遮止之不得。忽斷一指投棺中。哭仆地。是時孤兒才

二十六日熟睡老嫗衣衽間。嫗驚怖頓足長號。兒墜地。賴寡姑急抱之。得活。食頃。楊氏始甦。巳亥葬李君于青浦故隴。奇寒裂膚。指斷處。猶痛不可忍。無何子。女病痘瘍。楊氏裹血挫針。佐醫禱費。居恒屏跡一室。隣童村姆。汲漿索火。未嘗望見顏面。惟爲孤兒求智。慧。禮。觀。音。文。爲求延生。禮諸經懺。其它巫覡見鬼人等。不敢闖入門限一步地。孤兒五歲喪祖。屢勉喪禮。巳爲宗長漁其產垂盡。楊氏負孤兒對簿。哭而過市。謁訟庭。縣大夫憐之。事得解。而貧愈甚。勅孤兒出就塾。余見之。李先生坐隅。賞其奇穎。遂以女字之。稍長。從游于泖濱海畔。楊氏憂虞萬端。淚從腹中落。戊申歲惡。孤兒臥篤疾。楊氏營護始得瘥。與幼女刺繡買米飯。兒嘗絕粒。檢得敝枕中菘豆升許。煮糜。旋不忍下咽而止。巳酉嫁女。丙辰。孤兒娶余女。而楊氏逝久矣。初巳酉除夕。楊氏色慘然。嘆曰。未省明年此夕在何地。庚戌歲朝。受孤兒拜訖。出素履一鞞授之。曰。未亡人將赴十二年前舊盟矣。孤兒心悸不自持。亟奔告寡姑。邀女兄弟競相勸慰。楊氏執孤兒手曰。誓不

食明年新。我志已決。至八月。孤兒生月也。絕粒死。嗚呼。竒哉。孤兒名大節。績學能文章。郡侯陶公。邑侯章公。鮑公。學師熊公。嘗拔置第一。士論傳寫其文。以爲楊氏植孤之報。目前雖未遇。其志意卓犖。望而知爲鐵石竒男子也。夫臣殉君。婦殉夫。等節耳。然爲忠臣。托孤易。爲節婦。保孤難。彼其仗威靈。揭名號。收拾四方英雋。豪傑。以爲忠義倡。而楊氏以孱婦抱孤兒。寒幙殘燈。之與俱。畸形單影。之與侶。斷指于十三年前。絕粒于十三年後。蓋女中之龍逢。比干。伯夷。叔齊也。若其保孤而孤立。則又加于忠臣一等矣。李之先。有鍵齋翁。割心救母。操刀小廟中。血濺佛座下。世稱爲李孝子。惜不載青浦志。而楊氏之竒節。復使之泯泯無聞。非惟得罪于名教。且得罪于鬼神。余故作傳一。通藏之山中。采風者。表墓旌廬。或亦有徵于斯焉。

錢母陸淑人傳

陸淑人者。誥贈中大夫。山東右叅政。忠所錢公之配。宮允抑之。方伯康侯之母也。錢氏出表忠齋。元有修職郎國馮者。自臨安領嘉興侯。因家焉。尋析爲嘉善人。四傳爲邑廩生世華。其子萼。精于醫。纂醫海二百卷。萼生昞。昞生貞。是曰栢峯公。中嘉靖丁酉鄉試。令尤溪。歷楊州汝寧二守。以廉吏稱。栢峯生心亭公。吾仁。入太學。贈叅政。娶曹。贈淑人。舉二丈夫子。長卽贈公。贈公自少醇謹。卓然以儀軌自居。及長議

婚得長汀丞陸公女。十五來歸。保母趙媪。睨而嘆曰。新婦神明意審。矯矯邁上。異日祿幢褕翟中人也。旣廟見。出朝尊章。調御上下。逡巡皆有方局。宗人不敢以年少目之矣。初裝遣廉薄。已叔姒盛孺人入門。紈綺相照。環珮之聲。璆然。淑人處之晏如。盛產兒。外家具文襍錦綉。犀錢玉菓相屬。而淑人舉子。但率女奴治泉。以供湯餅客而已。然淑人待盛無間言。每事推掖之使前。調護甚力。贈公當析箸。採策得西第。輪奐方新。堅以遜其仲。而自處故居。稍稍漸理堂構。經營部署。悉出淑人手中。卽心亭翁嘗許葺治費。不忍索也。旣居別宅。去曹太君僅百武。淑人起居不離側。老嫗小奚遣餉。趾相錯。數偵其所餐。加損爲憂喜。太君常謬爲勇噉。以慰之。心亭翁病膈。贈公與淑人承響床第間。侍疾不解帶。治喪不勝衣。諱日生辰。饋奠飲泣。卽推及王舅姑。率子姓跪拜如禮。潔齋謹恪。說者謂其有詩禮薦浣采蘋之風。贈公性弘恕。不喜苛察。園丁有竊瓜者。家人有乘火攫金去而娶婦者。悉貫勿問。反好語囑之曰。無爲主母所知。而淑人則治家

嗃嗃。男女不比肩。寢興不失度。賞罰不僭約。卽夜半猶秉燭省視曰。雞鶩逸乎。犬飯乎。門牝闔乎。灶突燿火不息乎。則又呼其子而質之曰。而渴欲茗乎。而餒欲餅餌乎。而寒欲加衿乎。如是數四。乃卽安。贈公遇荒施賑。遇疾施藥。衣食無告之人。瘞埋無主之骨。峻却祖姑比隣之產。贖史生鬻兒。撫任氏一門疫厲。沒而經紀其喪。人以告之。淑人。淑人贊嘆從臾。惟力是視。不忍以拮据織嗇謝也。贈公嘗笑曰。家乘有健婦。書種有佳兒。豈復裹縫掖。埋沒枯螢老蠹中哉。遂謝去公車。日以課子爲事。手錄古人格言警語。榜之屏障間。諄諄以忠孝廉節相勸勉。淑人更以方嚴佐之。未辨色。蹴使興。燭垂跋。趣再讀。鏟落浮華。封部混沌。凡一切大人游。少年場。以及詩壇酒政之豪舉。非唯不使近。且不習也。文社有會。贈公拮題危坐。淑人走爨下。張具。繼以然膏。未嘗敢告紈。賢師友過從。爲咄嗟立辦。皆豐腆。而約束二子。不過數臠肉。三浣衣。稍請更易。瞪目怒不許曰。孺子輩。乃敢快意耶。康侯癸丑成進士。抑之登丙辰殿試第一。賀者傾城涸巷來。

觀。淑人痛贈公不及見也。謝客拒筐篚。間有趨羶附
熱者。禁勅勿與通。曰。先君子嚴義利。謹取予。處後守
雌。素風如昔。若導之。關說長吏。漁獵細民。吾家兒羞
而不忍爲也。嘗語仲子曰。汝司寇。無以三尺法。笞人
于丹書。語伯子曰。汝史氏。無以七寸管。蟻人于青史。
二子退而識之。康侯欽恤三輔。多所平反。抑之修
神廟實錄。不輕置衮鉞一字。翳惟淑人有紳訓焉。贈
公玉立白哲。方頤豐下。與人交。溫洽詳緩。觸之不怒。
挑之不爭。不乘急減值。不小惠市名。客有負債者。歸
其券。有負心者。則俛而笑曰。此宿世事也。笑而貸之。
邑大夫謝公。嚴以老更之禮。一往輒不赴。栽梧種菊。
顏其堂曰。清鑒。更自號閒棲居士。日與仲弟衛幕公
出入。飲食必與俱。怡怡如也。淑人待外家。無私假私
與。待兩婦。無左袒右袒。質明而起。操作如壯時。勸之
盍少休。嘆曰。惟懷與安。實敗名。季文子之母。樂羊子
之妻。何人哉。晚年戒殺。好竺乾先生之言。彌留時。命
眷屬環念大悲觀音者數千聲。氣體香潔。柔和如生。
雖不學佛。故是學佛作家。然巫覡師尼。及見鬼人等。

則門庭削跡矣。抑之名士升。康侯名士晉。海內號稱兩錢。比于眉山二蘇。金華二陸云。

陳子曰。贈公戊申前逝。淑人優游祿養。幾十五年。抑之康侯。似可少釋終天之憾。而語次輒泣不自勝。曰。吾于兩親有至痛。先公手抄六籍百家言。授以句讀。若望以名世。而不聞兩兒南宮報。一痛也。臚傳首選。遠近識一面者。皆爲額手。而淑人追念先公。反爲之喜極而悲。歛噓罷飲。一痛也。兄弟晝遊京輦。擬以板輿迎母來。重去家不可強。一痛也。士升艱子。淑人禱襖以祈多男。今舉兩雄。長者娶婦。裹青襟。次者讀書。已上口矣。而母與先公。曾否對笑地下乎。一痛也。弟代北門守。兄乞南陔養。而晉有疆場之役。母大憂。已觸璫燄。幾叵測。母聞之。又大怖。一痛也。今主聖清時。禍本頓拔。兩兄弟方將式歌且舞。以薦膝前。太平之觴。而母不我待。一痛也。六痛填膺。九原誰告。所恃以不朽吾親者。在志表傳。朱少師錢宗伯。業已憐而許之矣。兩公袞而史。子布衣而史。敢稽首載拜以請。是故陳子不辭爲之傳。

劉母錢淑人傳

淑人海鹽錢永州芹之女。按察使劉公烱之元配也。錢氏自臨江公以來。纍葉簪紱。多清人賢胄。永州公與劉太公朮同舉于鄉。嫗甚。相約爲婚姻。劉太公爲威縣令七年。裝不滿四十金。旣捐館。益中衰。按察公從永州公受書。永州公貴時。羣從兄弟。後先成進士。諸姻婭綺紈駢坐。按察公獨否否。永州公出繒綵授之。謝不內。而衣布衣。蹶躄如故。左右多鄉背有輕心。臨江公聞而歎曰。劉郎貧而才。又廉吏兒。少年不成。

名。吾不復相天下士矣。淑人十七歸按察公。晨朝鄭太君。太君目逆之。儀軌自如。以次委蛇起居。諸姊妹人人解頤贊賀。得婦賢。鄭太君性嚴重。造次必依禮。法少忤。輒加詈罰。每病熾。昏瞽于嘔。頭眩不得怡。淑人率袒衣膚裏相屬。掖臥起。跣步不離側。且晚上食。無敢平面視。中裊以下手自澣之。鄭太君心動爲解嚴。曰。新婦善事我。按察公官金谿。官留都。官臨川。皆與淑人俱。官閩粵。官黔。更官豫章。淑人奉太君于家。當龍頭寨。諸盜起。福寧曾一本起廣中。公在事轉餉。督兵甚棘。太君憂之。食不甘。淑人曰。吾矚其生平。塞進而好退。多讓而寡營。蓋恭儉吉德人也。卽置甕穴中。無死法。况其才足辦賊者。未幾果奏捷。捷書首推轂公。公遜績不居。卒如淑人所料云。按察公居官廉。淑人肩牙署。日課童婢種蔬績麻。尺寸不外索。司帑吏啗公羨金八千餘。公籍錄爲公家經費。嶺南之役。明珠異香。不點歸橐。曰。少染指。恐爲吾婦錢。淑人所笑。家居門風醇淡。賓祭以外宰。聞庖聲。淑人每與公對案下食。藿肉漿酒。取給輒止。餘則分甘旁媵。亦不

復少有異同。寢室中木榻絺帷。卽按察公亦十年布被而已。此淑人贊之也。太君春秋高。淑人亦肩差稱老。及奉諱。悃悼痛哭不勝喪。每細事動稱先姑。縷引遺令以勅諸子。子五人。其爲淑人出者。進士世埏。太學世坊。孝廉世教。而埏坊皆前天。淑人哺其孤雛。成佳士。當淑人在堂。子孫無敢衣錦見者。及歿。各受室。始稍稍更故時衣。子孫每相見輒頰首曰。吾甚愧淑人。吾甚愧淑人。淑人從官歸。嘗舟次沈氏里。其妹沈宜人除舍迎之。女從皆更裝。候矚屏幕間。有頃綦縞入門。單率如寡婦。問之卽劉家錢淑人也。僕御熟視。揜口笑。怪其疎質。而沈宜人憮然歎息。以爲不如故。傳者盡稱劉氏家法。爲遠近鄉里之冠。淑人初以按察公。南京工部主事。封安人。晚以伯子埏。南京刑部主事。覃恩復從公階。進今封。

陳子曰。吾讀孝廉之狀。按察公也。其庾信鮑照之流乎。若淑人狀。則龍門史也。江東之家。修褻輕袿。薰香洗濯。此不起單族。而起于豪門。又不起有檢之縉紳。而起于一二無識之女子。司世道者。心竊憂之。有如

淑人恭儉而有禮。豈非劉氏之女宗母師哉。劉向范曄傳列女。凡闖行皆得書。而後世非荆耳。斷髮之流。不編名于史氏。則黔婁柳下惠之妻何人哉。此余所以有感。而爲錢淑人傳也。

附外傳

唐李公子傳 并序

余下第歸。抱幽憂之疾。以道書淘汰之心。猛氣深。強抑不下。乃搜讀稗官家得李公子傳。唐書言鄴侯之子繁。不甚賢。今公子頗有奇韻。想繁之兄弟行也。但不知爲鄴侯第幾子耳。錄之左方。

李公子者。父泌。爲唐鄴侯。侯旣老。謝事辟穀。公子官襲侯封。不願侯。願詞賦科。時肅宗新復兩京。以兩京

賦試進士。御泰清殿親臨之。公子立就萬言。未嘗加點。賦上。上方午膳。太常作樂。命輟樂讀之。愛其美也。袖入宮中。擢第一人。勒石刻兩京賦于殿前。公子方十九。眉目清映。紫衣白馬。宛如神仙。上一見大喜。謂侍臣曰。鄴侯宜勞。再造邦家。曾不肯剖粒自飽。今其子雖不願侯。授官宜與侯等。以集賢學士授之。公子謝曰。臣實不敢當此。但乞告身一通。便宜山水間。縣伯不得追呼足矣。上嘉其志。御寫勅札。并賜宮嬪兩人。曰。一以掌書。一以煖酒。郭汾陽有女曰清明。君者有殊色。喜讀離騷。古陶謝詩。嘗刪詩去其鄭衛者。手錄一卷。日日批註。閨房中以小室廟祀。舜二妃配饗。以魯共伯之母黔婁之妻。春秋祭之以文。其高閒如此。汾陽王難其配。以李兩京賦視之。清明君慨然嘆息曰。可矣。旣歸李。李年少謔浪。醉時微以謔語侵清明君。不悅。見其謝過。乃笑曰。妾之天性。栖栖藝文。固其所長。若欲濡首酒杯。從公嘖笑。間乞煖熱。所謂籩豆之事。則有司存。無已。願以黃金千斤。爲公子置妾數百。以任恣討。汾陽王聞之也。遣人分馳四方。四方

有奇女子。以詩名顯者。搜訪殆盡。而其中曰纖纖。曰白娟。曰鷺翹。曰春萸。曰紅草。曰暈兒。曰綠絲。曰碎桃。皆骨柔氣清。熟於古文奇字。而纖纖善箏。白娟善歌。春萸善鑿古器。善笙。紅草善彈鳥。善鼓琴。暈兒善嘯。綠絲碎桃善種花花。經二人手無不活。又善騎馬。鷺翹善丹青。善舞。公子樂之以酒。酒必以詩。詩成。諸美人起而和歌。歌無襍聲。其地修竹清泉。細簾嘉樹。月出之時。鳥啼絃亂。相與牽衣抱袖。紅白低迷。起視草頭蕉葉之上。大都墨漬酒痕而已。清明君無問晴雨。每候山果新熟。則遣美人捧進。公子或書史有奇事。可讀者。以綵線識之。則遣捧進公子。或成新篇。或偶得一二佳句。不忍獨賞。則遣捧進公子。故美人人人得親公子也。而清明君當其酒半。嘗乘紫帷小車臨焉。公子率纖纖以下。短謳長歛。彈箏鼓瑟。次第上壽。酒已。則各以平日所賦詩獻。清明君焚香緩坐。細加品題。稍不安者。爲改點數字。每點一字。輒以一觴罰公子。曰君老於詩者也。不爲美人更之。乃含糊作影子過耶。是必容香火情。美人皆笑曰善。誠如夫人言。

是宜罰。如此者連罰數觴。公子竟醉矣。公子嘗游于蘓州。時有新進士選名妓百人。浮於荷花蕩中。衆進士本措大骨相。驟得此。足高志揚。畢露醜態。公子更布衣坐小舟。往來覷之。有進士呼曰。是小船中秀才何爲者。汝能飲酒乎。曰能。能賦詩乎。曰能。曰若是。汝且過我。公子岸然據其上座。執酒卮。瞠視雲霄。不爲禮。衆進士以爲狂生也。俟其酒乾。欲以詩困之。及分韻。公子謝不能。曰。頃固以謾語誑君一杯酒耳。實不曉詩爲何物。衆進士顧諸妓大笑曰。吾故料狂奴未必諳此。吾輩且自作詩。詩許久。沉吟不成一語。語出又村鄙可笑者。乃手舞足蹈。互相傳示。嘆賞不已。已而悉出金玉寶器。以陳富貴。耳語諸妓曰。是秀才曾見此否。傍有一黃衣妓者。秀質楚楚。愁態萬端。公子叩之曰。吾觀汝。一似有憂者。汝有心事可訴我。我爲汝料理不難。一進士掀髯大言曰。汝欲了此君心事。但恐酸秀才。正自不堪。是嘗負我千金。分毫無所償。今見我。不覺斂容耳。公子笑曰。此細事。何足憂。於是衆進士又大笑。轉以爲狂生也。頃之。公子之樓舡適

至鼓吹大作。公子呼進士與各妓過船。羅列食器。酒
罍皆以五色寶玉。明珠翡翠。雕鏤裝綴之。奇麗特甚。
公子見之斥曰。何乃陳此俗物。亟撤去。悉付黃衣娘
子。今日一段心事。爲汝結證了也。已命更席。則陶觴
瓦鼎。無非三代物。最近者亦秦漢銅器。隔簾女伴。隱
隱作樂。曲譜俱內調。及公子新詩。人間無聞者。進士
目視不敢問。使各妓拜而請詩。欲因詩尾得公子姓
名。已知其爲公子也。皆紛紛向前奪詩。公子令曰。汝
輩且置酒于此。若酒冷而詩不成。者罰我詩成而酒
熱者罰汝。往往酒未及溫。已搖筆滿紙矣。紙盡無可
奈何。乃裂帛絹。絹盡。則裂帷幕屏褥之類。又盡。則各
剪裙葉。或絕長袖以進。所得片言隻字。如獲奇寶。貼
身藏之。衆進士誘之以酒。酩酊多半竊去。妓有啼者。
公子以爲可憐也。公子起立。作樂女伴。乘間說之曰。
汝輩盡肯落籍從公子游乎。有別院在湖山之上。門
前朱樓一帶。覆以垂楊。松篁中粉廊紅榭。高臺短橋。
宜雪宜月。四面遶以梅花五六十里。深秋之際。則林
楓萬株。擁若霞氣。楓樹間有高樓。翼以堂廡。其正中

以奉藏經。其兩旁以貯古今異書。左有酒庫。凡天下名酒無不藏。右有泉庫。凡天下名泉無不具。若此者可以休汝矣。諸妓唯唯。乃盡從公子歸。公子悉召酒人劍客。高僧道士。曉夜酣歌。沉浮此中。賦詩之暇。非細談釋部。則酬論兵符。燭盡酒空。醉而後已。賓客既散。時與綠絲碎桃。高裝駿馬。踏入深山中。過平原易地。着鞭奪路。拋閃如飛。樹叢邊聽山鳥聲。則命紅草彈鳥。偶不中。皆拍手笑。浮以半觴。轉入幽險處。美人車不得度。攀蘿挽石。欲上欲下。笑哭裸出。忽到荒岡。

崇嶺之上。天風四來。暈兒清嘯一聲。水葉亂舞。裙裾飄脫。步立不定。公子懼其傷也。乃徐返馬。天下聞公子名。飢寒之士輻輳來集。候其將歸。皆匍伏道左。叩頭大呼曰。非公子無以活我。公子轉盼間。賞勞都徧。日費千金。無幾微顏色。一日就中忽有執公子衣者。曰。願辟人臣有所言。公子不憶於陵時乎。汝所謂於陵陳仲子者也。上帝憐汝貞苦。故今日置汝李家。涉獵世味。清明君卽向時辟纪夫人耳。夫日之光有短長。月之魄有死生。人之福有往還。公子宜早決。且汝

父鄴侯。及婦翁汾陽王。皆爲清微天帝君。待女夫婦
來久矣。言訖不見。公子大悟。以家產萬億計悉散之。
與清明君入洞庭石公山修道。不知所終。後陸贄之
華亭。常見公子往來三泖中。

范牧之外傳

余宅隣牧之。少聞牧之以情死。不敢問父老。比十年
奉化人之教。畧已定情。乃始許牧之子必宣。作牧之
傳。范生牧之。名允謙。伯父太僕。父光祿。爲文正忠宣
公後。牧之復以庚午舉鄉進士。生而頤廣額。頤頰而
下小削。目瞳清熒。骨爽氣俊。不甘處俗。華亭世家子。
出必鮮怒。錦衣狐裘。舞于車上。童子駢肩而隨。簪玉
膏沐。如婦女之麗。牧之見之。往往內媿肉動。毛孔蝟
張。輒障面去。牧之居恒單衫白裕。着平頭弁。與諸少

年頡頏而游。游遇豪貴人。牧之欠抑唯諾。陽嗛不敢言。衆以爲是生也。寒酸不上人眼。意輕之。牧之乃快。或坐客小覺。則拂衣疾趨出。急遣追呼者。問牧之。牧之飄風逝矣。性嗜書。無所不讀。能跳梁于翰墨間。有才子之志。客非韻。斥門者不納。納必以名香清酒爲供。或宴語夜央。喜不嗜寐。童子更燭割炙。復張具如客初至時。屋下雞鳴。猶聞鼓琴落子聲。及醉而嘯者。至是四方之客日益集。牧之恢張心胸。厚往薄來。故

杜生之事起。杜生者。妓女

也。以風態擅名。慷慨言笑。自題女俠。與牧之一遇于閨門。目成久之。退而執手。嘆曰。吾兩人得死所矣。君勝情拔俗。余亦俠氣籠霄。他日枕骨而葬太湖之濱。誓令墓中紫炁射爲長虹。羞作泃渙女兒。下指鴛鴦。上陳雙鵠。言罷大泣。衆驚其不祥。嗣後淹繫旬月。無復顧禮。毀頓精神。廢輟家政。客乃有爲文告神以絕牧之者。牧之荅曰。僕聞虧名爲辱。虧形次之。諸君子俱當世賢者。僕雖不才。忝惠莊之遇。舊矣。諸君子一且攝齊束帶。矢之神前。擊鐘伐鼓以絕鄙人。一時觀

者莫不駭遽狂走。謂僕當得夷族之禍。以至于此。甚而造作端末。飛流短章。筆之隃糜。付之尸祝。無煩檢考。遽定爰書。不須左驗。遂成文案。是忠告之義。同于擿舛。摭摭之過。近于文致。使僕不能含生于覆載。強息于人世。辱云甚矣。僕亦何人。其能甘之。唯有蹈東海而死耳。牧之既深情膠粘不解。而復爲諸客所激。若圓石遇坂。轉觸轉下。勢不得不與俱盡。會太守窘杜生出。辱之庭。牧之忍愧。以身左右翼。多悲辭。太守徘徊。不令下鞭。然終不許牧之。以一妓女燼。黜賣杜

爲賈婦。牧之佯諾。陰使人贖爲山西賈。得之以藏。別第。俄載而與俱。長安居長安邸。不三月。牧之病肺。歿。牧之既死。杜生勅家人。裝治其喪。歸而以身從。杜入舟。忽忽微嘆。間雜吟笑。如無意。償范者。至江心。命浴。浴罷更衣。左手提牧之宣和硯。右手提碁楸。一躍入水。左右驚視。不能救。初見髮二三尺許。沉浮旋瀾中。已復颺起。紫衣裾半摺。復轉睫間。而生杳然沒矣。余聞牧之。事光祿公秦淑人。及遇弟允臨。斤斤孝友。名教人也。因緣爲祟。卒耗俊姬。何哉。漢高項羽。英雄

絕世。劔鋒淬人。眼不爲眨。乃心銷神枯。終不能斷虞
戚之愛。夫二公賴有此舉。小足破俗。不然。項乃倔强
老卒。龍準公。一村亭翁。故態耳。語云。天下有心人。盡
解相思死。世無真英雄。則不特不及情。亦不敢情也。
牧之者。得無老氏所謂勇于敢則殺者歟。定盟旦誓。
永馬勿諼。沉恨幽疑。泮然渙釋。兩人可謂誠得死所
矣。使杜遲回獨生。或不欲生。而無幸以不汗病死。寥
寥千古。含怨何期。今而後知杜生之有以謝牧之也。
或曰。君家蠡首。倡風流。而唐杜牧之。奇宕挑達。半臥
粉黛中。以老。君于牧之。則諱姓。于蠡則諱名。垂二千
年。而合爲范牧之也。嗚呼。然歟。否歟。
贊曰。余與牧之子。必宜遊。生駒俊鶻。抑何其似牧之
也。必宣入國。而遇平康里。則疾回其車。市有倚門而
挑者。恥若面黥。惟恐唾沫形影之及。必宣少孤。心不
能記牧之短長肥瘠。而能不失尺度如是。父豈必身
爲教哉。夫曾子子父之相反。而趙括之讀父書也。爲
人後者。其奚擇也。

楊幽妍別傳

幽妍小字勝兒。生母劉。行一。在南院。負艷聲。早歲落籍。去嗣陳氏。陳之姨董四娘。挈往金閨。習吳語。遂善吳歛。董笑曰。是兒甫八歲。如小燕新鶯。不知誰家郎有福。死此雛手。陳歿。撫于楊媪。媪奇嚴。課書課綉。課彈碁。妙有夙解。不督而能。女兄弟多方狡獪。嘲弄詒侮。終不能勾其一粲也。庚申。楊媪避難吳越。載幽妍與俱。年已破瓜矣。薄幸難嫁。有心未逢。俯首叩膺。形于咏嘆。一日遇張聖清于秀林山之屯雲館。羣碎滿

前。席糾無主。獨幽妍兀坐匡床。旁無轉矚。掠鬟舐袖。笑而不言。私禱云。儂得耦此生。死可矣。張聖清者。才高筆雋。骨采神恬。造次將迎。綢繆熨帖。人莫覺其爲廉察使子也。舟中載圖史絃索。悉付小青衣排當。小青衣能射主人意中事。兼工竹肉。聖清曰。此西方迦陵鳥。以迦陵呼之。每攜入竹嶼花溪。遞作新弄。而最不喜平康狹邪之游。謂此輩正堪與鬪頭奴。大腹長鬣賈。相徵逐。豈容邪魔入我心腑。至是與幽妍目成者。久之。明日遂合鏡于舟次焉。于時溽暑。晝則布席長林。暮則移橈別渚。疎簾清簟。縈繞茶烟。翠管朱絃。淋漓酒氣。幽妍自謂十五歲以前。未嘗經此韻人韻事。卽聖清亦曰。世豈有閨中秀。林下風。具足如勝兒者乎。昵熟漸久。絕不角勁語。媒詞。兩人交相憐。亦復交相重。曰。吾曩過秀州草庵外。聞老尼經聲。躍然抱出世之想。自慚絆縛。不能掣鞵奮飛。今昵君串珠纏臂。持戒精嚴。同心如蘭。願言倚玉。十年不死。請事空王。宿羽流螢。實聞斯語。聖清飲涕而謝之。七月應試。白下。幽妍送別青溪。注盼捷音。屈指歸信。竝爾杳然。

及重九言旋。而幽妍先驅渡江去矣。自此低迷憔悴。瘵疾轉深。腰減帶圍。骨見衣表。王修微謂余曰。吾生平不解相思病。何許狀。亦不識張郎何許人。今見楊家兒。大可憐。始知張郎能使人病。病者又能願爲張郎死。郎不顧立枯爲人腊矣。聖清聞之。遣急足往視。幽妍開緘。捧藥涕泗汎瀾。嫗克忍閉絕魚雁。消息不通。幽妍典簪珥。賂侍兒屬桃葉渡閔老。作字以達意焉。肩鏹斗室。不見一人。卽王孫貴游剝啄者。指刀繩自矢而已。媪卞怒竝甚。搥詈無人理。取死數四。救而復甦。不得已復載之東來。聖清偵狀。義不負心。有俠客徐內史。就中爲調人。彈壓悍嫗。無得故懸高價。殺此鐵石兒。媪唯唯。聖清乃納聘。迎爲少婦。稽首廉察公。遂遂如女士。且覬宜男。勿詰責也。比入室。病甚。猶強起薰香。澣衣。劈箋滌硯。聖清手書唐人百絕句授之。讀皆上口。又雅能領畧大義。每環回離腸。斷魂之句。掩抑不自勝。真解語花也。病中解脫了無怖容。佛號喃喃。手口頗相續。忽索鏡自照。不覺拍几慟哭曰。勝兒薄命。遂止于斯。又好言謂聖清曰。君自愛。切勿

過爲情痴。旁招訶笑。妾如有知。當轉男子身。以報君耳。又曰。妾命在呼吸。偃大人新宅不祥。盍移就郡醫療之。歲徧除夕。聖清歸侍椒觴。別去。幽妍惛惛啼益促。侍兒問有何語。傳寄郎君。但瞪目搥胸。不復成聲矣。蓋壬戌臘月二十七日也。聖清奔入城。且號且含。襖延僧修懺。撤葷血者兼旬。雕刻紫檀主置座隅。或懷之出入衣袖衾裯間。食寢必祝。祝必啼。啼曰。吾欲採不死藥。乞返魂香。起幽妍于地下而不可得。又欲金鑄之。絲綉之。倩畫師寫照百回。而未必肖也。何如徵傳眉道人。爲逝者重開生面乎。余曰。傳且就。恐挑哀端。俟君病良已。乃敢出。而詎料君之終不及見也。幽妍墓在龍華里。聖清選地結茆龕祀文佛如來。償其始願。修竹老梅。環映左右。清芬涼影。颯如有人。畫眉郎。散花女。其將比肩提臂。踏歌而嬉于此乎。古有廬江吏華山畿。歐陽詹秦少游之義娼。糾結夙緣。一慟而卒。初疑出于誕妄。今乃信爲果然。如幽妍聖清者。少判在鳳窠羣。鴛鴦牒中。豈死于情哉。死于數也。余不忍以介靜辭。爲作別符。付子墨墨娥。相與流通。

晚香堂
卷之十九
之。死乎不死矣。

眉公先生晚香堂小品卷之十九

雲間陳繼儒著

記

求忠書院記

松府治之西有求忠書院者。何爲特祀。遜志方先生而創也。先生生于天台。死節于金陵。於松何居。曰。松有先生後在焉。後何居。曰。葉公琰。謝公鐸。張公汝弼。王公世貞。詳哉言之矣。且方氏手跡支譜。甚覈而詳。先生血胤在松。則血食亦宜在松。此特祠之所由建。

云。當先生抗命時。魏澤以刑部尚書謫寧海尉。受詔捕方氏。幼子德宗垂九歲。澤匿之。有台人秀才余學夔者。乞食翔于市。口喃喃唱歌以諷澤。澤心動。叱曰。扶顛子去。越兩日途遇歌如前。澤知其爲義士也。乃密托德宗于余。入松江島嶼中。歷青村諸鎮。以織網買米得活。余又潛入郡。屬祠部郎俞允護翼焉。時任勉爲叅政。家居聞之。就見德宗。德宗初引却。怖而欲逃。勉出癸酉錄示之。知允與勉皆門生。乃始安。自此各爲異人。陰相往來。允妻以養女。冒俞氏。恐同姓。賈禍。旋改余。轉遷白沙鄉。而學夔亦遠遯。不得跡矣。德宗三子。娶俞者。友直。友諒。繼許生者。友竹。子孫繁衍。具居華亭。本末詳載譜。萬曆己酉。督學侍御楊公廷筠。訪其事于松司理毛公一鷺。毛公訪之陳子繼儒。得實。楊公捐俸三百金。馳檄立祠。復其姓。衣冠其大宗之孫顯節。而祠尚有待也。太守張公九德適至。挺身許曰。九德先生之鄉人也。德而不任。誰當任者。天以方先生六尺之孤。委之雲間。昔日方氏之存滅。在魏在余。今日方氏之存滅。在我。有如聽其自續自。

絕。自明自晦。豈惟塗視方先生。實與屠剪錮禁何異。
異日

天子詔求先生後。其安所置對。將遂爲子虛。亾是公而已乎。古者愛羊及烏。存大體也。子弟爲尸。迎生氣也。况以先生之血胤。薦先生之血食。盼饗相屬。夫寧不歆。于是謀之華亭令。聶公紹昌。蠲吉鳩工。莊嚴廟貌。崇祀先生。而魏公澤。余公學夔。俞公允。任公勉。徐公善安。配焉。構以重堂。繚以峻垣。翼以兩廡。門敞而扉滌。祭毖而田備。秋毫皆太守張公力也。祠成之日。太守以庚戌冬至。率僚屬迎主入祠。謁奠成禮。士民樂觀者萬餘人。及辛亥端午。命陳子儒爲之記。陳子再拜稽首而謝。公曰。異哉此舉。昔者高皇帝以夏變夷。

文皇帝以叔代侄。此古今一大鼎革也。先生縗麻入闕。哭聲震殿。刀環築口。批及兩耳。收妻女。赤十族。市先生肉者。賜之金。發先生之祖骸而投之井。此古今一大慘也。

天子與孤臣爲難。豈趙朔李固比哉。予遺所在。前有

賞。後有誅。跼天踏地。晝伏夜行。千鈞引絲。所餘有幾。此古今一大險也。遺蛻不敢收。遺札不敢藏。子孫不敢自名其祖。春秋家祭。嘿對飲泣。卽有好義吊古之士。疇敢向先生禮一瓣香者。此古今一大鬱也。今皇帝登極。首詔表章諸君子。復天台之故墟。修金陵之舊冢。請補賜謚。而未及子孫。特不知一塊忠義血。正在松耳。今二百餘丁。悉復故姓。退而耕鑿。進而絃誦。躋躋踰踰。歌斯哭斯。九重無必伸之威。而十族無必餒之鬼。此古今一大快也。忠義激而爲憤。哀洲詛楚之詞。非後史之所必及者。與。而先生俎豆儼然。箕裘無恙。以此調人鬼之不平。而關百世之橫口。此古今一大繼述也。廟貌旣新。講學院中。瞻仰先生。則夷齊尚在。同難者八百七十三人。則田橫五百義士尚在。若魏若余。若徐若任。則趙朔之杵。日程嬰。李固之王成。尚在此。古今一大榜樣也。先生爲浙中第一名儒。爲國朝第一忠臣。而發潛闡幽。訪求先生之後者。則督學楊公自武林。司理毛公自睦州。太守張公自甬東。又皆先生之鄉後進也。意者當年仗義共

聊齋堂 卷之十九
事諸公。分身應現。或抱孤于覆巢完卵之時。或報命于禁網濶疎二百四十餘年之後。此古今一大因緣也。嘻。此又古今一大奇也。是故陳子繼儒拜命額首而爲之記。

重修忠肅于公墓記

萬曆甲寅。武陵楊公。以御史奉命理兩浙鹽筴。下車武林。首謁于忠肅公墓下。嘆曰。浙中伍大夫。岳武穆與公鼎立而三。而公祠宇如陋巷矮屋。無論謁者。偃僂几筵。有如公肅儀擁從。出入廟中。詎此一丸土。能容數百萬風車雲馬乎。於是捐俸。命仁和令喬君。鳩聚工料。式增廓之。而此祠巋然。遂成湖上偉觀。公屬陳子碑而記之。大抵忠臣爲國不惜死。亦不惜名。不惜死。然後有豪傑之敢。不惜名。然後有聖賢之闕。

黃河之排山倒海。是其敢也。既能伏流地中。萬三千里。又能千里一曲。是其悶也。昔者土木之變。

裕陵北狩。公痛哭抗疏。止南遷之議。召勤王之師。虜擁

帝至大同。至宣府。至京城下。皆登城謝曰。賴天地宗社之靈。國有君矣。此一見左傳。楚人仗兵車。執宋公。以伐宋。公子目夷令宋人應之曰。賴社稷之神靈。吾國已有君矣。楚人知雖執宋公。猶不得宋國。於是釋宋公。又一見廉頗傳。秦王逼趙王會澠池。廉頗送

境曰。王行度道里。會遇之禮畢。還不過三十日。不還則請立太子爲王。以絕秦望。又再見王旦傳。契丹犯邊。帝幸澶州。旦曰。十日之內。未有捷報。當何如。帝嘿然良久曰。立皇太子。三者公讀書得力處也。由前言之。公爲宋之目夷。由後言之。公不爲廉頗王旦。何也。嗚呼。

茂陵之立而復廢。廢而復當立。誰不知之。公之識。豈出王直李侃朱英下。又豈出鍾同章綸下。蓋公相時度勢。有不當言。有不必要言者。當

裕陵在虜。

茂陵在儲。拒父則衛輒。迎父則宋高。戰不可。和不可。無一而可爲制虜地也。此不當言也。

裕陵旣返。見濟薨。郟王病。天人攸歸。非

裕陵而誰。又非

茂陵而誰。明率百官朝請復辟。直以遵晦待耳。此不必言也。若徐有貞曹石奪門之舉。乃變局。非正局。乃劫局。非遲局。乃縱橫家局。非社稷大臣局也。或曰。盍去諸。嗚呼。公何可去也。公在則 裕陵安。而

茂陵亦安。若公諍之而公去之。則南宮之錮。後不將燭影斧聲乎。東宮之廢。後不將宋之德昭乎。公雖欲調郟王之兄弟。而實密護吾君之父子。乃知回鑿公功也。其他日得以復辟。公功也。復儲。亦公功也。人能見所見。而不能見所不見。能見者。豪傑之敢。不見者。聖賢之悶。敢于任死。而悶於暴名。公真古大臣之用心也哉。竊嘗謂

裕陵之返國。

高皇帝不殺元順帝之報也。天生于忠肅以衛社稷。

聊齋志異 卷之卅九
高皇帝廟祀余闕之報也。然忠肅以讒死。報何居。夫使公功成身退。老死故鄉。亦郭汾陽李西平等耳。獨鏤之劍賜。而胥濤泣。風波之獄構。而岳廟尊。迎立外藩之冤酷。而于墓慘。公至是一腔熱血。始真有灑處矣。迄今湖山之上。古塚纍纍。身死名滅。不可勝計。而東西往來于公之廟門者。登故壠。掃枯松。禁樵牧。哭英雄。又非獨侍御楊公一人而已。特侍御倡俸修墓。慈勅楹宇。垂百年餘。而表章忠賢之典始備。是不可以無記。

重修范文正公祠堂記

萬曆甲辰。御史馬公奉命按吳中。興賢軌俗。率先風化。乃首謁范文正公先生于故祠。仰視榱棟。旁周門廡。咸摧圯不治。廼喟然愾嘆。與郡守李侯謀。所以新公祠者。於是陶甃度材。不半朞而告成。公十七代孫主奉太學生允觀。十八代孫諸生必溶。率族之子。姓再拜。徵予文爲記。用副御史公表章先賢鉅典。予惟公事蹟載在宋史。若歐陽神道碑。考亭名臣錄。不啻詳矣。予則烏能記公。獨念公少而孤貧。塊處一室。

饘粥不贍。進士解褐。鬻馬徒步歸。及爲執政。焚黃姑蘇。僅搜庫絹以散親戚閭里。知舊小有俸餘。捐置義田。南園數畝地。又推之以建郡學。度公平生殆未嘗享。有一日。士大夫之奉者。夫同一吳耳。當時士大夫良田美宅。與其人轉盼俱盡。卽其人亡。其姓名存。誰復爲之禮。一瓣香。薦一杯水者。而公之祠至今獨存。百世而後。御史又相與撤而更新之。則士大夫不當以此易彼明矣。公爲將相時。邠慶二州之民與屬羌。皆畫像生祠祀公。及卒。羌酋數百哭如父。齋三日而去。祠滿海內。一祠又何足爲公重輕。特以吳故鄉父老丘隴所在。子孫旅食于義田者。歌哭祠下。公其責然而來思乎。未可知也。吳中祀典最著者。太伯子游。暨公而三。公遜田贍旅。舍宅建學。有太伯之心。以春秋授孫明復。以中庸授張橫渠。又延胡安定入太學。爲諸生師。濬發道脉于濂洛關陝之前。其功又與子游學道相表裏。豈若鄉先生沒而祭于社者等乎。御史特新公祠。蓋推本公爲宋儒理學淵源之祖。使吳人以公重。吳俗亦以公厚。凡士大夫有意收恤其族。

人而加禮于學校者。遇公之祠。或尚有興起焉。是不可以無記。

用拙堂記

吾友杜玄度。所居有用拙堂。屬陳子記之。陳子咨其義曰。吾少而讀天下書。善忘。登朝不十年。解綬歸。善倦。藥裹不去。善病。治家人產。善挫。與人游。未知其眉睫喉嚨胸臆間事。善憤憤。蓋世莫余拙也。雖然。吾道是也。昔者杜子美之句。若爲余設者。陳子曰。吾游于世。而覺論語之爲異書也。參之魯。回之愚。蓋三致意焉。何者。以其拙故也。拙者以艮止。以巽入。以隨動。以遜藏。以謙始。以泰終。知此謂之至人。而儼捷狡獪之

徒顧反竊竊然笑之。庸詎知愚公之徙山。不如臥游之適也。陶長沙運甕。不如抱甕之安也。何晏之談塵。不如括囊之無咎也。石季倫之金谷。不如一瓢之屢空也。謝康樂之挈裾捉席。不如籃輿之真率也。夫巧者以爲得。而拙者亦未必失也。拙者以爲失。而巧者亦未必得也。皆天也。鵲之巢而鳩奪之。蜂之釐而人甘之。然則巧勝乎。拙勝乎。善乎。玄度之用拙也。嗟夫。蝸升而枯。鶻噪而敗。雀掉而驚。鼠譎而獄。猿捷而射。人巧而禍。才賈忌。富賈怨。辯賈辱。宦賈讒。使人玄度若也。天下可以無事矣。故曰太冲若盈。大明若昧。大巧若拙。吾願與玄度共勉之。玄度交知。傾海內名士。不索之記。而索之陳子。其真有用拙之意也夫。

占星堂記

唐元徵以萬曆丙戌擢鼎甲第一。以己丑奉 上命
秉桐圭。竣事鄭藩。旋車華亭里。里父老扶攜子弟。婆
娑關門曰。是錦衣朱幡。廣皙而白者。非昔唐氏澹窩
先生之子也耶。先生故長者。有子矣。間嘗憶往事。嘉
靖間先生之堂落成。其從弟鵬谷公安寢而夢。有星
岸然盤跚而走。獨垂一印。大如斗。厥文則奇。曰。敕子
魁。碧睛瞳朧。朱髮歲隄。鵬谷公心動。起告先生。召占
者卜之。得鼎之六五。鼎黃耳金鉉。占者曰。金鉉。印纍

纍也。夫敕也。爲先生名。敕子而魁。先生其有後。後其居鼎之首。天官記曰。魁去海岱以東北也。魁旦建則指離。其在丙乎。時未舉元徵。及元徵弱冠。雖時名噪起。而家中落。此堂寄他人手者幾二十年。而今始克還舊物。一如占者言。于是繪以金書。雕以藻文。題曰占星堂。而屬記于不佞。嘗觀古今冊書。以高科獲雋者。往往歸之讖符。使匹夫匹婦震駭嘆羨。以爲鬼神造化之所爲。人不得而寘力焉。然元徵之獲占于天。占而適與吉祥合也。易也。第亦知天下之占元徵。與元徵之自爲占者。益重且巨乎。當其爲諸生時。肝腸清虛。面目嚴冷。以文章節義自任。今出入中秘。讀人間未見之書。必將益大其所學。以立副中外之望。非苟而已也。夫校讐則太乙星見。繪字則十八星見。此特清華之氣。上與精通。又不見魁下六星。兩兩相比。曰三台星者耶。分陰陽。建四時。均五行。移節度。定諸紀。皆繫于斗。斗爲帝車。運于中央。三台明。天下昌。三台昏。天下極。斯固轉移于元徵心上之斗杓。而星翁曆師之所不能占者也。元徵慎之哉。昔于公之門焉。

而高。王氏之槐。馬而三。以此方淡窩先生。可謂善食。其報矣。顧所言鄙。非吾黨所望。元徵者。元徵曰。有官。居鼎。無地。起樓臺。敢不敏。安得大厦千萬間。蔭。天下飢寒人。請曰。長孺之言。勉之。余喜而爲作。占星。堂記。

聚書樓記

聚書樓者。廬陵郭筆峯先生誦讀處也。先生有子章。設公。以邑令奏最第一。贈先生文林郎。又奉 覃恩。贈南京吏科給事中。而學者祀之。瞽宗。稱筆峯先生。如故。先生髫年。補逢掖。食餼。十困棘圍。三置副榜。晚。以明經試。大廷。例得郡邑博士。竟謝歸。初居荷溪。再居新洲。及慶嶺。博綜古今典墳。而尤好坐虎皮。談。易。四方負笈者。爭北面焉。得弟子。卽以購書。不能。購。則且借。且錄。且綴。且補。久之。几案戶牖間。皆箴銘。

簡冊也。結樓三楹。題曰聚書樓。俯而讀。仰而思。遇有所得。輒吹燭書之。南面百城。殆無以易此樂矣。嘗考古今圖籍之富。隋嘉則殿。三十七萬卷。唐麗正殿。二十萬餘卷。宋崇文書院。八萬卷。凡一切竹簡韋編。靈文秘檢。或掌于宮人。或繕寫于五品之子弟。或精校于上衮。或懸官爵金帛。廣募于四方。四方有應。有不應。而兵燹復出。而兀之。不如民間之故家野老。猶有存十一于千百者。如廬陵郭氏是也。筆峯先生重然諾。謹取與。範俗類大丘。而不願市。獨行名。好吟類元

亮堯夫。而不願市詩人名。獨其天性嗜古。鳩集異書。至不惜損衣縮食而聚之。玄泓在左。丹鉛在右。危坐孤樓。聲出金石。庭訓章毀公。卓然巨儒。循吏大要。從讀書得力中來。然莫敢取一縑一錢以獻。懼逢先生之怒也。先生家無長物。唯書在。亦無美宅。脂田。惟聚書樓在。子孫有賢而文者。追維手澤。不忍付之碩鼠。蠹魚饑腹中。會萃增補。當學鄭漁仲求書法。出入嚴。可以保存。曝涼時。可以持久。當如黃魯直珍書法。銓次精審。當學宋宣獻校讐法。老年窮經。當學劉貢甫。

夾袋法。快讀。當學蘇子美下酒法。至于舉子獵其辭。吾獨覈其意。舉子志科名。吾獨志道德。又當學筆峯先生課子法。審若是。郭氏之書種。寧歲月筭數可既乎。雖然。書不厭多。亦不厭少。若欲誇籤軸之浩繁。裝裹之華煥。雖嘉則麗。正崇文所藏。亦復何益。畢竟消歸自己。括爲王佐儒宗之助。則恕之一字。謙之六爻。論語之半部。已覺其終身用之而有餘。此又筆峯先生聚書之本意。而郭氏子孫能且暮誦讀于此樓。書過半矣。故諾章毅公之請而爲之記。

貞靜庵記

古者聖賢。惟有經世法。女事內。男事外。虔修剛柔以佐兩儀之軌。自竺乾流沙。二氏之教興。于是擲儒冠而冠黃冠。裂儒衣而裹緇衣。沿流導源。甚則閨媛闈秀。相與結伴。而談無生不死之理。施釵金以布地。剪纏錦以制幡。貝葉蓮花。蓋半屬優夷女道矣。是庵所棲。爲諸女真焚禮禪誦之所。二六貝梵韻于樹端。燈光熒熒。丙夜不息。可謂旃檀之香林。玻璃之寶地也。陸宮保先生以三教龍象。爲大摠持。爲大護法。遂以

貞靜命庵。夫堅固清淨。天地之體也。惟貞故獨立萬物之先而不彫。惟靜故獨當諸塵之后而不擾。既貞且靜。可以定覺海之瀾。登道岸之筏。撤無明之網。探罔象之珠。何者。生死二緣。本無定體。而妄者以識風鼓之。慾燄吹之。勝劣頓熒。忻厭交起。故空中粘縛。夢裡山河。遞滅遞生。終無了際。此不貞不靜之所致也。諸女真苟能思惟此義。則一彈指間。金粟玉宸。宛然接影。蓋珠之宮。兜率之院。安知非是庵也耶。昔散花天女。欲轉女身。尋覓其身。了不可得。而三山五岳之巔。如金母魏夫人。踏白雲而策青鸞者。孰非昔日閨閣之淑女哉。余故記之于此。以俟他日庵中人道成。梵笈金書。與諸上真共載其姓氏云。

觀濠堂記

昔摩詰圖畫輞川香山命篇池上皆以討天機于逝
者非止托心賞于泠然有美吾師實弘斯理偶剪蓬
蒿之徑漸成桃李之蹊止水一泓爲山半簣鷗磯清
淺花枝笑于鏡中雉堞參差人影行于樹杪璧月映
柳鳧鷺在汀停雲淡而無言芳草淒兮不斷四圍秀
色翠籠薜荔之牆一道晴霞霜暈芙蓉之浦枯蘭吐
蕙稿木蒸芝神仙于此樓居大夫從之賦作醉來刻
竹清歌散渭畝之陰倦以據梧幽夢仗鬱林之石夕

陽殿角。蕉葉扇而鹿眠。點雪鑪頭。茶烟橫而雀避。紅
亭客散。碧芝風生。門設不關。簾鈎半上。凭軒踞後。猊
之鼎。隱几披龍馬之文。身侍羲皇。地隣濠濮。登斯堂
也。盍往觀乎。魚鳥親人。鬚眉可鑑。謙而善下。含哲士
之虚心。淨以納瑕。得碩人之雅量。淡成君子。信薦王
公。進退近乎中庸。安流類乎無競。澄懷觀道。何如世
上之風波。抱膝鼓琴。聊爾胸中之丘壑。

曲周縣趙大夫開渠記

開渠古法也。農天下之本。農重則水田重。水田重則
泉流灌浸以育五穀。而渠更重。古有堰渠使。有都水
備使者。則其官也。置碓置碣。置斗門。則其規製也。史
渠白渠。鄭國渠。浚儀渠之類。則治水者之成蹟也。王
介甫好興水利。自熙寧三年至九年。穿渠凡一萬七
百有餘。諸路鑿空。應之多。詭而少實。吾朝重河。不重
渠。行河使者。歲糜水衡錢無筭。而渠則委之郡邑長。
曰。有司者治之耳。有司秦越視民。強半掩耳。掉臂去。

卽遣椽相視畜泄啓閉興復之宜。曾有幾人哉。獨曲周邑大夫趙公則異是。曲周者。滏河繞城而曲周之。故邑以得名。其水去邑十二里。自西北東漸近關之東隅。稍北置閘。導滏灌漑。俄有漳水闌入之。漳性剽疾而多濁。石水常五斗泥。非特淤閘。行且城患。故寧涸漑。無敢通滏水者。垂二十年。滏水不通。則鹽井苦澁之味無以解。綆而食之。往往得病。趙大夫流覽愾嘆。此水泉上腴。而湮爲惡田。汙池可乎。乃乘築堤之役。緣堤爲溝。建二閘于漳所不到之處。一截河。一倚

堤。而滏水從此滿漑矣。有青烏家過而相之曰。此城外河內渠。水望巽入。文運其昌乎。利一。清流匝城。魚鳥下上。蒹葭采采。荷葉田田。利二。有土可耕。可稻。有畦可灌。可蔬。利三。避鹽井。飲甘泉。如去壅而疾蘇。如出否而鼎潔。利四。上不關領詔書。下不科配丁夫錢。谷。勸誘子來。畚鍤雲集。利五。此數利者。皆大夫閔閔皇皇。朝不朝夕。不夕。經營擘畫。以底于成。厥績偉矣。大夫父中丞。叔太宰。稟承家法。不察察爲明。而有大臣風骨。在邑五年。修學城城。新壇壝。創社學。兼置田

以助其歲餼。而開渠特其善政之一耳。陳子曰。嘻。無輕視渠也。吾讀書喜搜僻事。漢胡羹侯信嘗置一門三堰于舒城。河渠書不載。劉貢父爲廬州從事。見此始表而出之。魏築千金碣。五龍渠立一石人。若腹若東西脇。皆有記。其畧曰。後當興工。宜就西磧。故書之于石。以遺後賢。古人不忍輕毀故渠。并不欲掩作者之姓名。蓋如此。今曲周渠成。雖趙大夫不伐功。不市名。而畜泄啓閉興復之故。不可不以盡告後之人。後之人約束而擁護之。以無忘大夫之艱難。雖世世名趙公渠。可也。故諾銓部劉公箋纂其始末。而屬陳子爲之記。鑱于代言之石。大夫姓趙。名胤昌。號芝庭。萬曆丙辰進士。山東掖縣人。

許公治青浦河工告成記

往東南三載旱潦。

天子宵旰而思所以紓萬姓之急。部臣上書。無若興水利便。而恪恭不二。明習于水利之政者。度無踰按察許公賢。于是

天子顧太宰爲勅璽書

賜公。顧大司農爲辦水衡

錢二十萬待公。顧大中丞直指使者。毋有所梗制。而務協濟公。公至之日。卽召諸司及鄉父老計之曰。河有幹有支。幹者導江河之水而注之海。以通漕便商。

支者麗于田。而令溝澮洩且蓄焉。使旱不至于龜坼。而潦不至于鳧脛之沒。幹母也。支子也。子母灌輸而水道得矣。公之功肇于戊子之歲。而迄于庚寅。踐冰霜。沐風雨。凡課督于三年。而經營于四郡之內者。卽毫髮無遺力。故百姓踴躍以聽橐鼓。其費半而功亦倍之。某間嘗詢諸青浦鄧君。君爲余言公治河狀。公所濬艾邗。橫歷諸浦。水爲幹者。凡九。其附庸于幹以爲支者。凡七十有八。橫縱爲丈者三。深如之。加尺者五。金散者三千八百有奇。餘以付邑吏筦庫之鑰者。百有九。公挾四千之帑。藏務爲節縮。上食其功。民食其力。彈指而成。百世尸祝之業。舉青溪而他邑。與郡可知也。蓋公往嘗奉

上命。持節佐司空治漕。漕成。

上爲賜黃金。遷僕卿矣。今徙而治吳。此何異一鑿之炙。而烹之。函牛之鼎哉。雖然。余則嘆公之于是役也。有五難。漕雖鉅。上有司空。次有御史大夫。可以借籌于諸賢。而仰成于主者。今一切拮据。公欲以身悉肩之。難一。

上重國本。睠焉南顧。悉國家之力。以與漕敵。而不敢愛內府之畜。及數世之賞。以事功臣。今許公水衡錢二十萬。業請其半。半則部使者。局不與矣。難二。調漕事日上。

天子心動。謗者抱樂羊之書。而不敢獻。今吳遠在千里外。未悉其勞苦。端木而群咻隨之。難三。歲稔則可。歲薦飢。而舉大役。議者謂疲民。不可以重勞。災地不可以處衆。寬之玩生。急之釁起。難四。漕河無中制。而公自監司而上。有所咨啓。其可。可。否。否。必冊報留臺。

以奏微于朝。難五。夫公負天下之五難。日夜惴惴。惟簡書之不力。是懼。而不知公之深者。亦妄擬以中之。或有所梗。而未必卒竟其成。乃公以孤忠結

主上。以朴誠結諸臺。而以一念之勤苦。消潔結士大夫。百姓之心。從容委蛇。上不疑。下不讎。廣于收功。而約于較費。及臻厥成。天下晏如也。夫上之于河。急在北。則借公于北。急在南。則徙公于南。公之身如轉轡。而其談笑。以奏功名。亦如形影之必赴。公今者。豈特獻最。而被玄圭之錫。卽往日佐漕小中。蜚語而不得。

明齋堂
卷之十九
暴者。今竟白矣。夫東南衣履天下。爲朝廷外庫。漕其
喉領。四郡之支幹。譬尾閭也。尾閭淤鬱。雖有喉領。將
焉用之。然則公之績在天下。豈特世世以襟帶吳之
人也哉。鄧君屬余記之。余雖鄙。不容無言。稍倣太史
遷河渠之遺。以勒之石。

許秘書園記

士大夫志在五岳。非絆于婚嫁。則窘于勝具。勝情于
是葺園城市。以代臥游。然通人排闥。酒人罵坐。喧笑
呶詈。莫可誰何。門不得堅扃。主人翁不得高枕臥。欲
舍而避之。寂寞之濱。莫若鄉居。爲甚適。吾友秘書許
玄祐所居。爲唐人陸龜蒙用里。其地多農舍。漁村。而
饒于水。水又最勝。太公嘗選地百畝。菟裘其前。而後
則樊澹水種魚。玄祐請甃石圍之。太公笑曰。土狹則
水寬。相去幾何。久之。手植柳。皆婀娜縱橫。竹箭秀擢。

菱牙蒲戟與清霜白露相采采。大有秋思。玄祐乃始
築梅花墅。竇墅而西。輦石爲島。峯巒巖岫。攢立水中。
過杞菊齋。盤磴上躋暎閣。君家許玉斧邁。小字映也。
磴腋分道。水唇露數石。骨如沉如浮。如續如斷。躡足
蹇渡。深不及踝。淺可漸裳。而浣香洞門見焉。哈呀峯
竇。竅暗䟽明。水風射人。有霜雹虬龍潛伏之氣。時飄
花板。冉冉從石隙流出。衣裙皆天香矣。洞窮宛轉得
石梁。梁跨小池。又穿小酉洞。洞枕招爽亭。憇坐久之。
徑漸夷。湖光漸劈。苔石纍纍。嚙波吞浪。曰錦淙灘。指
顧隔水外。修廊曲折。宛然紫蜺素虹。渴而下飲。逶迤
北行。有亭三角。曰在澗。所謂秋歛半簾月。春餘一面
花是也。由在澗緣堦而登。濃陰密篠。葱蘢模糊中。巧
嵌轉翠亭。下亭投暎閣下。東達雙扉。向隔水望見修
廊曲折。方自此始。余榜曰流影廊。窈窕朱闌。步步多
異趣。碧落亭踞廊面西。西山烟樹。撲墮檐瓦。几上子
瞻與元章。欲結楊許碧落之游。楊爲楊羲。許爲許邁。
亭義取此。碧落亭南曲數十武。雪一龕。以祀維摩。居
士由維摩庵。又四五十武。有渡月梁。梁有亭。亭可候

月空明。漱灑。縠紋輪漪。若數百斛碎珠。流走水壺。水晶盤。飛躍不定。渡梁入得閑堂。閱爽弘敞。檻外石臺。廣可一畝餘。虛白不受纖塵。清涼不受暑氣。每有四。方名勝客來集。此堂歌舞。遞進觴詠。間作酒香墨綵。淋漓跌宕。紅綃于錦瑟之傍。鼓五搗。雞三號。主不聽。客出客亦不忍拂袖歸也。堂之西北結竟觀。居前楹。奉天竺古先生。循觀臨水。浮紅渡。渡北樓閣以藏秘。書。更入爲鶴蘂蝶寢。游客不得跡矣。得閑堂之東流。小亭踞其側。曰滌硯亭。亭逶迤而東。則湛華閣。摩于羣木之表。下瞰蓮沼。沼匝長堤。而垂楊修竹。芡蒲菱。芡芙蓉之屬。至此益紛披輻輳。堤之東南陰森處。小。縛圍蕉鷗鷺。鳧鷖若作寓公于此中。旅坐不肯去。此。中。桃霞蓮露。續繡綺錯。而一片澄泓。蕭瑟之景。獨此。寫出江南秋。故曰滴秋庵者。王太史游香山。欲與二。三子作妄想。若斬菰蘆陂隰。盡田荷花。使十五小兒。錦衣畫舸。唱采蓮詞。出沒于青蘋碧浪之間。可以終。老。今玄祐不妄想而坐得之。又且登閣四眺。遠望吳。門水如練。山如黛。風帆如飛鳥。市聲簇簇如蜂屯。蟻。

聚而主人安然不出里門。部署山水。朝絲暮竹。有侍
兒歌吹聲。左絃右誦。有諸子讀書聲。飲一杯。拈一詩。
舞一掉。浴洄而巡之。上留雲借月之章。批給月支花
之券。袍笏以拜。石丈絃索以謝花神。此有子之白樂
天。無謫貶之李贄皇。而不寫生絹。不立粉本之郭恕
先。趙伯駒之圖畫也。秘書未老園日涉。石日黥。魚鳥
日聚。花木日爛熳。篇章詞翰日異而歲不同。余且倣
角里先生。藤轎豹席。筆床茶灶。叩君之園而訪焉。相
與唱和如皮陸故事。玄祐能采杞菊以飽我否。

游桃花記

南城獨當陽。城下多栽桃花。花得陽氣及水色。大是
穠華。居民以細榆軟柳編籬。緝墻。花間菜畦。縮結相
錯如綉。余以花朝後一日。呼陳山人父子。煖酒提小
榼。同胡安甫。宋賓之。孟直夫。渡河梁。踏至城以東。有
桃花。蒼然推戶闖入。見一老翁。具雞黍餉客。余輩衝
筵前索酒。請移酒花下。老翁愕視。恭謹如命。余亦不
通姓字。便從花板酒杯。老饗一番。復攀桃枝。坐花叢
中。以藏鈎輪贏爲上下。五六人從紅雨中作活轆轤。

又如孤猿狂鳥。採葉窺果。惟愁枝脆耳。日暮乃散。是日也。老翁以花朝爲生辰。余于酒後作歌贈之。謂老翁明日請坐卮脯爲壽。十四日。余與希周直夫叔意。挈酒榼甫出關路。途得伯靈子猶拉同往。又遇袁長史披鶴氅入城中。長史得我輩看花消息。遂相與反至桃花溪。至則田先生方握鋤理草根。見余輩便更冠出肅客。客方散踞石上。而安父賓之箕仲父子俱挈酒榼佐之。董徐何三君從城上窺見色爲動。復踉蹌下城。又以酒及鮮筍蛤蜊佐之。是時不速而會。凡

十八人。田先生之子歸駢爲十九。榼十一。酒七八。壺觴酒屈興信花。醉客醒方苦。甕罌相恥。忽城頭以長綆。縋酒一尊送城下客。則文卿直卿兄弟是也。余輩大喜。賞爲韻士。時人各爲隊。隊各爲戲。長史伯靈角智局上。紛紛諸子飽。壽空拳。主人髮短耳長。龍鐘言笑。時酒瀝尚餘。乃從花籬外要路客。不問生熟妍醜。以一杯酒澆入口中。以一枝桃花簪入髻角。人人得歡喜吉祥而去。日暮鳥倦。余亦言旋。皆以月影中抱持而顧。視紗巾縹袖。大都酒花花瓣而已。昔陶徵君

以避秦數語。輸寫心事。借桃源爲寓言。非有真桃源也。今桃花近在城齒。無一人爲花作津梁。傳之好事者。自余問津后。花下數日間。便爾成蹊。第賞花護花者。舍吾黨后。能復幾人。幾人摧折如怒風。甚雨。至使一片赤霞。闌珊狼籍。則小人于桃花一公案。可謂功罪半之矣。

梅花樓記

王元美嘗謂余。市居之迹于喧也。山居之迹于寂也。惟園居在季孟間耳。然王氏之弇山枕城中。朝暎暎門。遊屐麇集。卽主人亦往往支門謝客。欲放而之於曠閒無人之鄉。而不可得。余然後知園之與衆也。寧獨與其謀于市也。寧謀于野。吾友范象先有園在橫澇野塘之南。去城十里而近。喧寂半之。四面榆柳陰翳。小池上梅花兩樹。婆娑相對。蒼枝老骨。縱橫屈曲。排簷而上。其幹可抱。其葉可蔭一畝餘。其子可得五

石。范子謂吾見梅多矣。未有如此君之老而奇者。乃結高樓以臨之。獨與一二老衲。攤虎皮。爇猊鼎。倚樓而歌之。曰。雪滿山中高士臥。月明林下美人來。已復笑曰。如李廸詩。不過得花之幽韻閒淡而已。吾家老梅。政如碧眼胡僧。修眉露額。又若毒龍怒虬。紛拏媾鬪于廣莫之野。攫瓜迸鱗。鬼怪萬狀。度他梅詎足與此君爭勝。庶几鍾賈山之嘉樹。四賢祠之紫藤。差昂足耳。范子樓既成。于是廣蒔霞桃芙蓉來禽之屬。以鞅帶之。池加闢。竹加徙。梅之爲觀。日閑以敞。而陳子

適來。陳子曰。吾嘗聞往年探梅者。過壽安寺中。寺僧爲游客所困。至析而爲薪。而其次惟光福玄墓之傍。薄雪輕雲。漠漠數里。一快生平。然村人率以種梅爲業。不復有品題護持。與梅花兩相韻者。古今梅花之知己。僅得林逋君復。迄三百年而有范子。范子于此中塊焉。野處。白板赤欄。朱簾碧幄。依微獨立于暗香。踈影之外。何異處士孤山。所少者童子開籠放鶴耳。他日抱鶴上扁舟。送之花下。烟沙星渚。短笛悠悠。有巍然破輕浪而出者。則陳先生至也。子其報梅花吐

一枝以候我。

虎丘三泉亭記

吳人不善附麗。山亦如之。虎丘是也。凡地勢相牽相聯。若斷若續。突爲崇山峻嶺。綿爲蔓壑枝峯。散爲飛泉噴瀑。多使人心胆震眩。耳目旋轉而不得停。大抵附麗者必高大。高大者必險絕。其勢然也。虎丘前無援。後無推。孤行獨峙于平疇衍漾之中。而不見有因緣攀附。巉巖刻露之跡。其秀至今甲天下。石平如砥。泉瑩如雪。陸羽張又新品泉而甘之。埒居第三。與中泠。惠山鼎足矣。申文定自少喜登此山。解相印歸。數

與故人父老。觴咏其上。斟泉淪茗。欣然忘歸。曰。百歲後。吾竟。鬼猶應依此。文定薨。郡中業有專祠。至是。士大夫醵金。考室。復祠。公于劔池之南。霍澗之西。曰。公平康正直。一生相業。無所附麗而起。此水此丘。神所樂也。祠北恰枕三泉。寺僧久屋其上。湫隘塵垢。日月之光不射。雲霞之彩不生。岡卿司理。捐金錢。施僧。撤屋剝土。土去而石根露。石露而泉脉疏。穹壁高廣。截若刀削。凡數百年。鐫題字跡。隱隱出嶙峋隙縫間。禪窟懸崖。經聲曳于樹杪。石梁浮澗。苔紋繡于水中。周之以曲廊。扞之以闌楯。游者逡巡玩流。憑三泉亭而小憩焉。夫自古有此虎丘。卽有此清泉石壁。歲不絕歌舞。太平日不絕品題名勝。鮮有發覆疏明。爲泉石一洗塵土面目者。有之則文定之岡卿司理始。搜剔經營。則客周伯讓始。文定有靈。將無釋冠劍。屏侍衛。夷猶于亭之上下乎。人靜山清。花疏月淡。公左挽顏魯公。右拍蘓學士。呼取闔閭健兒。盡發魚腸三千試。舞于鉄花巖畔。生公說法。何胤講經。遠道士放霍。陸桑苧點茶。王家短主簿。但令展衣掃石。綆汲第三泉。

數斗作供樂哉斯丘。公舍此焉適哉。問卿笑曰。眉道人。是語快不可言。卽文定當爲解頤。請筆而記之。

飽菜軒記

吳長卿官灤州刺史。僅六月。當遼左軍興。悉索敝賦。莫能支。以彊直節省得罪去。移倅楚德安郡。郡圃蕭然。構新齋三五楹。讀書其中。餘地種菜。鮮魚甘膾。壹似野叟田庚之挈挈灌畦者。陳子聞而高之曰。吳子貧矣。憊矣。長卿曰。人生衣食裁足已厚幸。又薄有官俸。以供俯仰。不謂貧。新齋適成。客贈花贈雀。贈數種書。門生問字。剪霜莖烟甲共享之。不謂憊。昔韓晉公一吏。冥司勅主人間食料。三品以上。日支。五品以上。

而有權位。旬支六品至九品。季支料幾何。此鬼神所
不甚吝。飛而食肉者。所不暇爭也。舜糗草。孔飯蔬。閔
含菽。范斷葶。周顛之早韭。晚菘。蔡樽之紫茄。白苧。卽
聖賢豪傑皆然。况吾儕何人。而敢望五侯鯖。郎官鱸
乎。吾嘗笑何曾不食大官。所設滋味過于王者。李贄
皇丹砂寶玉。雜投馘羹。此復何樂。亦復何味。遂至罨
入五欲甕中。幾老死不得出。二公有知。悔不作飽菜
軒主人耳。長卿才甚奇。書甚博。胸中甲兵甚富。而能
性安藿食。若將終身。頗得遷吏吏隱之樂。玄德謂張
桓侯云。吾豈種菜者耶。長卿笑而不答。

微道人生壙記

修微姓王。廣陵人。自幼有潔癖。書癖。山水癖。自傷七歲。父見背。致飄落無所依。眉嫵。間常有恨色。已奉竺乾古先生之教。刺血寫小品經。間讀班馬孫吳書。人莫得而狎視也。嘗行靈隱寺門。見白猿坐樹端。迫之。展翅飛去。包園夜半。有兩炬炷射窗縫上。諦視之。虎也。修微挑燈吟自若。其詩詞娟秀幽妍。與李清照朱淑真相上下。至於排調品題。頗能壓倒一座客。慕翰墨者輻輳案前。如農訴水旱。修微攢眉應之。擲筆。

出避西子湖。避鄧尉山。避廣陵。尋獲兄。指其父埋骨處。仆地哭失聲。延僧作水陸道場。凡十五日。以薦父靈筭中綺繡環瑱。隨手立盡矣。修微飯蔬衣布。綽約類藐姑仙。筆床茶竈。短棹逍遙。類天隨子。謁玉樞于太和。參憨公于廬阜。登高臨深。飄忽數千里。智能衛足。膽可包身。獨往獨來。布帆無恙。既歸。出楚游稿示余。冰雪淨其聰明。雲霞汰其粉澤。抑名山大川之助乎。脩微曰。自今伊始。請讖從前。綺語障買山湖上。穿容棺之墟。葺屋藤床。長伴老母。豈復問王孫草。劉郎桃。蘇小小同心松栢哉。予曰。今君才貌兩艷。人間所羶。出世之盟。將無太早。修微曰。嘻。是何言。孔雀金翠。始春而生。四月而凋。與花萼相衰榮。每欲山栖。必先擇置尾之地。然後止焉。然禁寺綴之以爲帚。蠻中采之以爲翼。甚有烹而爲脯。爲腊者。色可常保乎。鸚鵡馴擾慧利。洞曉言詞。官家奇愛之。或教詩文。或授佛號。而未免閉于金籠。搏于鷲鳥。則韻語又可常恃乎。予歎曰。常情仕諱歸。年諱老。而修微少不諱。死不諱墓。昔者淵明自祭。樂天自銘。司空圖引。平時故交。

聊齋堂
卷之十九
痛飲生壙中。三君子以後。鮮有嗣續高風者。修微達
視。死生如晝夜寒暑之序。女史乎。女俠乎。一變至道
矣。生壙成。諸名士爲彈孔雀經一卷。供鸚鵡舍利十
餘粒。并穴置其詩稿百餘言。眉道人爲之記。

附碑記

浙督學孫子長先生去思碑記

孫子長先生督學浙中。皆推爲人天師。微中蜚語。旋
請歸臺。使者駭歎堅留之。將疏聞於朝。而先生接
浙行矣。行之日。士民挽轍攀帷。尾送渡江。不忍別。旣
別。猶戀戀不忍釋諸懷。乃謀俎豆先生於專祠。以志
永永。王子陽云。民者弱而不可勝。愚而不可欺也。余
則曰。士者悍而不可勝。慧而不可欺也。孫先生何以
得此於士民哉。先生嘗爲吳興掌故。又以戶曹郎推

擇出守杭。愷弟廉明。強半與越人習。習公者。聞督學命下。喜見鬚眉。已又搖手相戒曰。孫公天下正人也。勿私謁。勿以非禮干。干之如捫數千尋鐵壁耳。先生下車後。其調察加詳。而言笑顧盼亦加峻。諸生有五。人連名入溷郡邑長吏者黜。有赤舄華裾。格五博六。浮浪少年場。睥睨狹邪徑者黜。有自詭名豪健俠。談孫吳鬼谷。妄引非聖之書者黜。有挾權要之關說。倚書史之掉弄者黜。其他挺辭權貴。痛絕郵筒。大索神姦。窮搜弊竇。自先生以及郡邑之長。不唯同心。而且苦心。不唯無遺術。而且無遺力。夏鼎燭妖。秦圖照膽。無加於先生矣。彼言者何爲哉。先生權稅滸墅。曾節五千金助餉。上疏委宛不例。後人以此思清。清可知也。太守謝客有署門之詞云。齋頭脫粟。詎可留賓。嶺上白雲。豈堪持贈。簿書鞅掌。不能代湖山。而稱主人。闐闐蕭條。不敢腴膏脂。以供顏面。客躓之。多及門。叱馭而返。以此思嚴。嚴可知也。先生唯清嚴。故無欲。無欲故無情。無情故聞謗能無辯。去留等於閃電。譽誹付之飄風。迄今含沙鬼矢。不能秋毫有加於先生。而

俎豆尸祝於行後者。則士民如出一口。越君子之言曰。吾聞學者通利則思師。說義則稱師。說不稱師。命之曰叛賢。主弗內之於朝。君子不與交友。昔季償等二百七十餘人。有詣朝乞留陽城者。漢諸生千餘人。有陳元上書追訟歐陽歛。平原禮震年十七。願乞殺身自代者。古弟子不忍叛背其師。乃如此。今孫先生文章典麗。局度宏雅。衡鑒精微。清如水。執法如山。而突然牴牾於無端風影之口。吾等豎儒。上愧禦侮之子路。下慙城歛之門人。所恃藉手以報師者。唯有捧土築宮。生祠先生於西湖耳。初先生艱嗣。士民走群望祝之多男。尋舉雄。先生笑曰。吾子生武林。武林人亦吾赤子矣。第守郡肫肫如慈父。視學則教戒肅括。凜凜如嚴師。既稱得士心。又稱得大體。悅斯服。服斯感。感斯憤。憤則不平之氣。與不忍別之情。心口約結。而不得宣。其在代言之石乎。故建祠淨慈寺西。特揭貞珉。以志先生去思。而徵陳子爲之記。

戶部長玉錢公澣墅關生祠碑記

陳子耕白石山中有客稽首以碑請。余釋耒而問曰：何碑？曰：以碑錢公。余曰：錢公權澣墅有廉名。尸而祝之固宜。三拔之士。五方之民。而醵金捧土。琢碑無異詞。何也？荅曰：昔之關使者。通商惠民。公爲關使者。通商救荒。雖司權實司命也。禮能禦大菑。捍大患。則祀之。請專祀公。以志去思。可乎？甲子。公以司徒郎入澣墅。時方仲夏。霖雨徹旬。月不休。米粟翔踴。當事下遠糴。閉糴平糴之令。富人扃廩以規數倍息。飢者僵於

途。悍者掠於市。聲聞遠近。豪商大賈。壅上流之粟。莫敢前。吳越且蠢蠢思動。公曰。吳越腹也。滄墅咽喉也。喉一梗。雖有粟。腹得而食。諸於是。刻木張諭。懸於蕪湖京口之間。遠商有販粟入境者。免料一尺。以招徠之。土商有販粟出疆者。給郵符以護持之。吳撫牒至者。全蠲之。浙撫牒至者。半蠲之。他郡懸牒則衷之所。蠲不知幾何緡矣。去無譏訶。來無盤驗。粟舟不待召而集。粟價不待壓而平。而公猶未已也。飛章以控朝貴。洒涕以勸兩臺。請賑請蠲。請改折。請設粥糜。又請

宦遊度關者。速下湘楚豫章之粟。而公猶未已也。捐七百金以賑饑民。又捐三百金以賑寒士。而公猶未已也。減市價之二。平糶千五百石粟。分給常熟太倉長吳諸邑。復核本關上下凡三十里窮而無告者。按月計口。全活不勝計。且欲與守土諸賢。盡截關稅。共濟時艱。而籲天無從。惟有仰屋嘆耳。至於征商免量料。免耗羨。免農庄免鬻蔬販豕。免市民貿易之貨。免回空之檢詰。免牙儉之供應。免冗役之詐冒。免訟謀之勾攝。免時值之抑勒。嚼蘖飲冰。加意節縮。修潰塘。

修奎星文昌閣。修周濂溪尹和靖諸祠。嘉與諸文學。立社授食。談說經術。北面皈依者津津矣。一切善政。視前使則加密。視穰歲則加寬。關政荒政。遞相灌輸。於其間。公之言曰。救荒非權責也。然司徒事也。在周禮荒政十有二。聚萬民。首散財。次薄征。舍禁去譏。遂居其二。今日擊非常之重災。而恐以局外委之。膜外置之乎。與其藉苗櫛髮。剝商以自肥。毋寧通商以起溝中之瘠。與其筐篚餽牽。媚貴人游客。毋寧以此活餓殍而杜亂萌。公識甚卓。公心甚慈。而亦甚苦。行且驅車往矣。今年自春徂夏。雨霑霑復不休。菜麥糜爛。士民牽衣而啼。如兒索乳。如母顧兒。公一朝挈付後人。懷抱中。度饑飽何如哉。公少年高第。脂膏不染。能早透義利關。米粟流行。又能度億萬姓於人鬼關。關吏如此。事事皆可楷模。雖司權實司命。雖司命實導師。故德公者。不忍釋然于公之去已。遠近走相告。特築專祠於五達之衢。塑繪公像。薦之清泉。且徵陳子碑其文。以告繼公而來者。

松董漕方且心遺愛碑記

郡丞且心方公。由壺關令。移劇洪洞。其異績載在百政錄。庚戌。業已下尺一徵公。需次爲臺諫。會有沮公于當路者。出丞吾松。洪洞百餘人。走京師。上疏攀留。訴太宰輿前。不報。明年公董漕入都。洪洞人猶尚在。當除夕。醵錢。刑羊豕獻公。公麾之。曉諭數四。乃散去。其爲人思慕若此。已下車松郡。旋領漕事。漕竣。拜南司農郎。而松之思慕公。不啻洪洞也。則相與奏牒鹽臺楊公。公特命樹碑鍾賈山之道左。是地也。軍民漕

明倫彙編 家範典 卷之十九
艦之所必經。華青送迎之所必駐。里道均。耳目集。斯民之畏壘鄉乎。諸紳裾父老屬記于陳子。陳子嘆曰。江南之俗。凡司理邑大夫被徵者。道有碑。像有祠。蓋感與羶俱焉。若方公而繫去後思。其三代直道之遺哉。公治行最高。而處公郡丞則最屈。非有輕去其官之心。則將更絃而鼓。善刀而藏。猾猾焉以刻日待遷而已。何知漕事。卽漕事簡者厭其煩。文者厭其俗。弛肩掉臂而去之已大幸。又誰肯爲百姓必然之畫者乎。而公獨否否。蓋國家之漕有二。軍漕以儲九大鎮也。民漕以儲六官百執事也。等王土也。獨江南五郡之民。走三千里外。轉二十一萬四千八百石之粟。此于役最煩。等郡丞也。獨公轄五十八艦。粟四萬餘石。此于江南丞最苦。何也。有丞名而無丞實。有漕害而無漕利。故也。公每論及此。輒慷慨任曰。孔子敘政曰。食。曰兵。曰信。而食先之。唐關中時。斗米千錢。韓滉運百萬斛入朝。德宗與太子動色相賀。則漕豈細事哉。漕弊久爲民困。惟弊端清自君子。弊孔塞諸小人。而轉漕始稱便耳。故事漕額水脚之費。每艦八百餘金。

邑上之漕大夫。漕大夫以次分之鄉賦長。公曰。此邑事也。檄使盡散之。毫髮不以染指。度所却恒例。不下二千餘金。此便于在家者一。故事民漕苦軍橫。苦暴關。公力請之當事。軍不敢虐民。關不敢苛稅。不查驗。不車運。而吾松超爲首幫矣。此便于在途者二。故事內官監。與局庫倉場。誅求無厭。而公挺身先之。或轉相居間。耗贈比他艦。獨輕。交納比他郡。獨易。其便于在京者三。而公不止是也。公堂有禁。公費有禁。交際雜儀有禁。胥隸橫索有禁。卽筆楮薪蔬之屬。絕不煩之鄉賦長。民便公。因便漕。漕法一變。卽漕大夫之故習。亦爲之一變矣。公非爲是皦皦也。蓋北運之難。獨五郡知之。海內不知也。獨漕民知之。卽五郡士大夫不知也。獨漕運丞知之。卽他丞不知也。以不可知之役。而加之以不可期之程。風濤不可測之險。與公私不可費之費。非公設身虛地。推心置腹于諸苦中。漕其能濟乎。公頓途旣久。往往不給。或轉貸故人。甚則典衣鎔帶。童僕不堪其憂。而公畧無感慨不自怡之色。且曰。人情不甚遠。諸役人家。豈盡腴。卽父母妻子。

之慮。豈盡憇然。其勞苦當百倍我耶。衆聞之。皆感動泣下。而公又著爲感動要畧。凡苦不能盡言。言不能盡竟者。燦然筆之于書。謂卽此是真學問。卽此是真利濟。卽此是真忠愛。雖舍清華而就冷署。舍冷署而就水濱。甘之矣。噫。公真聖賢豪傑之用心也。誠廉吏也歟哉。公文章高古。酷類荀管。所著有心問。皆先賢所不經道。暇則與文學子弟揚確古今。人甚懷之。治郡攝青邑篆。聽訟徵賦。皆有惠政。而漕爲大。故書其大者。張之道左。自公漕後。邑侯與漕大夫。皆相約却恒例。不取一錢。公創之也。則碑去思。宜自公始。

青浦賀令君景瞻公去思碑記

青浦創邑以來。賢大夫可指數。而無若獲鹿賀公。品最真。聲實最著。主計者僅拜刑曹郎。老稚走相告。詫謂無天。公率諸生拜祭海忠介祠而別。攀帷繫車者。追送及數百里外。公何以得此于青人哉。青之始邑也。華亭上海。割其厥壤之最下下者。蕞爲邑。其本原業已瘠弱。他復從而漁獵之。貌雖類中邑。而元氣索然。稿矣。吾鄉宦于朝者。特推擇賀公來。公下車甫病瘡。又迫於朝。

天之期。不輕見短長。已覲畢。還邑。精采百倍。曩時且倍於東諸侯之最有聲者。老稚喜可知也。公早起坐堂。皇左右却立案側。屏息階下。鮮有抱不急之牘。溷公押署者。訟牒卽屬本訟人。刻日追呼。不遣悍隸。聽其束身自詣。卽止。徵比錢穀。不煩鞭箠。能如期如額。卽止。編審十年。里排不設。公正。主戶役。客戶貼銷。其貧無衣食者。使無困。卽止。監司臺使者至。不浚民膏血。以飾厨傳。供帳第不失禮。不得罪。卽止。士大夫往來獻酬。不令喜。不令怒。卽止。文學孝秀。季有試。月有會。爲程其稅文高下。使虛往實歸。卽止。漕粟官民屯。悉貯於倉。粟糝雜責在民耗。抑勒責在軍。不分左右袒。軍與民兩平。則止。其他縣尉而下。肅括惟謹。無敢輕用非刑者。輕繫囹圄者。輕出白票市物。及勾攝人者。而上下晏如矣。曾見公兩年以來。有片紙隻艇。下村落乎。有胥隸徵索豚蹄斗酒乎。有累日積旬。匍匐訟庭乎。有破碎大家乎。有械縛單戶乎。有宵人奸輦笑乎。有博徒鬻飲。惡少年舞于市乎。有子襟私請恩澤乎。有兵將訴餉非時乎。上官以峻檄下。公勿怖。顯

要以甘言嘗。公勿受。吾愛我鼎。吾用我法。操真實心。行真實事。而青邑號稱治平。且以其暇修樓櫓。葺橋梁。以及海忠介祠。又以其暇撰史論。搜別古人之心腸。以洗開士子之眼目。公精神何其整暇。而青邑之元氣。何其休養而生息也。以青邑醴泉治狀。合爲卓異。誰不以銓曹臺省望公。而公竟擢刑曹去。公論爲憤懣不平。而公功名甚淡。意色甚夷。顧瞻邑士民號啼攀戀之情。獨有不忍遽釋然于懷者。而青士民豈能頃刻遂釋公哉。公瀕行之日。不取青谿一錢一練。至貧不能治裝。老稚嘖嘖奇之。及聞其尊人爲繕郎。董兩宮之役。所省金錢一百五十三萬餘。特與執政中貴挺左其官。而乃知公之宦不求捷徑。廉不市清名。蓋本之鳳山先生家教然也。故樂而誌之。以志去思。并以爲後之司土者告焉。

眉公先生晚香堂小品卷之十九終

明香堂

卷之十

